

Escrito por Alvaro Peralta
Mércores, 26 Xaneiro 2011 18:52



O goberno tripartito de Gondomar desestimarán as trinta alegacións presentadas ao proxecto da Relación de Postos de Traballo (RPT) para conseguir a súa aprobación definitiva no próximo pleno ordinario a celebrarse o venres 28 ás 9 horas no Auditorio Lois Tobío. Os gobernantes PP, Move Gondomar e os 4 concelleiros non adscritos tamén presentarán un novo proxecto de saneamento que afectará a parte da parroquia de Gondomar. Pola súa banda o BNG, que en principio se opoñería á fórmula da RPT, tamén presentará dúas mocións, unha contraria ao anteprojecto de lei da Área Metropolitana e outra referida a medidas para salvar a milenaria ponte de Mañufe dun posible colapso das súas estruturas, situación xa informada por Valminor.info ([ver artigo](#)).

As trinta alegacións presentadas no transcurso da exposición ao público da RPT serán desestimadas en bloque por ser todas iguais afirmou a portavoz do PP Natalia Salgueiro, quen non entrou en detalle do contido das mesmas. A moción xa foi preparada polo equipo de goberno e compromete ás tres forzas que o integran. A concelleira non deu por aprobada a moción a pesar da maioría absoluta que ostenta no pleno (12 concelleiros contra 5 da oposición), no entendido que podería haber lugar a modificacións na mesma durante o transcurso da sesión.

Pola súa banda a mesa sindical dos funcionarios da corporación que en principio ían realizar unha rolda de prensa para comunicar a súa posición crítica coa postura do goberno na RPT, postergaron a mesma para logo da realización do pleno, á espera da resolución definitiva.

No día de hoxe, o BNG deu tamén a coñecer a súa intención de presentar unha moción baixo o título SOS PONTE DE MAÑUFE, onde reclamará a realización dun diagnóstico urxente das estruturas da ponte milenaria e o seu acondicionamento por parte de tódalas administracións involucradas na conservación e coidado da mesma. A iniciativa tamén alude a comprometer ás diferentes administracións na construción dunha nova ponte que de alivio á presión de tráfico que sofre a devandita obra medieval.